

〔日本書紀_{二十三}〕十年九月霖雨桃李華。

〔日本書紀_{二十四}〕元年十月是月行夏令無雲雨十一月癸丑大雨雷丙辰夜半雷一鳴於西北角

己未雷五鳴於西北角庚申天暖如春氣辛酉雨下壬戌天暖如春氣甲子雷一鳴於北方而風發十二月壬午朔天暖如春氣甲申雷五鳴於晝二鳴於夜庚寅雷二鳴於東而風雨辛丑雷三鳴於東北角甲辰雷一鳴於夜其聲若裂辛亥天暖如春氣二年二月是月風雷冰雨行冬令三月乙亥霜傷草木華葉是月風雷雨水行冬令四月丙戌大風而雨丁亥風起天寒己亥西風而雹天寒人著綿袍三領

〔日本紀略桓武〕延曆十一年六月甲申朔寒人或著絮

〔日本紀略平城〕大同二年十二月是冬烏雀乳桃李華

〔日本後紀嵯峨〕弘仁二年九月是月桃李華

〔續日本後紀仁明〕天長十年五月辛丑北山玄雲黯靄山嶺不見終日天寒衆人多著襖子

〔續日本後紀仁明嘉祥〕二年四月癸巳天隕霜焉風景之寒宛似冬二月

〔三代實錄陽成〕元慶五年正月庚戌朔藏冰厚薄不奏以去年不沴寒凌室空虛也

〔三代實錄光孝〕元慶八年四月九日己亥申時雷電雨雹摧傷草木之葉古曰凡雹者冬之過陽夏之伏陰也過陽冬溫伏陰夏寒矣十日庚子天寒殞霜十一日辛丑霜降十六日丙午霜降氣寒十七日丁未夜寒霜降草木葉彫

〔日本紀略醍醐昌泰〕二年五月十三日乙巳外記廳前萩花發蓼穗出又五畿內諸國早稻皆秀可謂奇怪六月四日丙寅東宮有藤花又監物局枇杷花不發而有子生或熟或青小於常子人皆食之

〔扶桑略記醍醐〕延喜九年四月五日庚子霜降嚴寒時人莫不愁

〔扶桑略記醍醐〕延喜九年八月宮中及東西京櫻桃李柚柿藤等皆華李柚子生也